

91-боб. «Аллоҳ юзини қабих қилсин», дема



19:23 / 13.07.2020 3286

172. Абу Ҳурайрадан ривоят қилинади:

«Набий соллаллоҳу алайҳи васаллам: «Ҳеч қачон «Аллоҳ юзини қабих қилсин», деманглар», дедилар».

Шарҳ: Кишиларни сўкиш, ҳақорат қилиш, бировнинг юзи Аллоҳ таоло томонидан хунук қилинишини тилаш мумкин эмас экан. Бунинг сабаби кейинги ривоятда баён қилинади.

173. Абу Ҳурайрадан ривоят қилинади:

«Зинҳор «Аллоҳ юзингни, сенинг юзингга ўхшаган юзларни ҳам қабих қилсин», деманглар. Чунки Аллоҳ аzza ва жалла Одам алайҳиссаломни ўзининг суратида яратган», дедилар».

Шарҳ: Аллоҳ таоло Бану Одамни улуғлаб, мукаррам қилиб қўйган. Шунинг учун ҳеч бир кишига «юзинг қабиҳ бўлсин», дейиш мумкин эмас.

«Аллоҳ азза ва жалла Одам алайҳиссаломни ўзининг суратида яратган» деган жумланинг маъноси ҳақида уламолар бир оз баҳс қилганлар.

«Ўзининг сурати» деганда «Одамнинг ўз суратида» деган маъно назарда тутилган, дейишади баъзи уламолар. Яъни Одам жаннатда бўлганида ҳам, ундан чиққанида ҳам доимо ўз суратида бўлган. Ўша сурат муҳтарам ва мўътабардир, уни ҳақоратламаслик керак.

Иккинчи гуруҳ уламолар эса: «Ўзининг суратида» деганда «Аллоҳнинг сурати» лейилмоқчи, дейдилар. Билувчи, эшитувчи, кўрувчи ва бошқа сифатларга эга бўлган Аллоҳ таоло ана шу суратлардан Одамга ҳам ато қилган, деган маъно келиб чиқади, дейишади.

Нима бўлганда ҳам, Одам боласини юзи қабиҳ бўлишини тилаб қарғаб бўлмайди.

«Одоблар хазинаси» китобидан